

ài pensât di suplí al lamp e al ton,
brusànt pèule e batìnt il tamburòn;
invece di sàëtis,
rochetóns e fusetis;
in primevere e istât,
za che la nestre ròie à trist savór,
nol à di plovi che aghe cul mistrât;
quanche il soreli al dà masse calór,
uei viàrzilu c' une canevazze
e ciazzaì sù de glazze;
po tel crût de l' unviar
'o lu disglazzarai sul fogolâr;
la lune, simpri intèrie,
jevarà co 'l soreli larà sot,
e lusarà dute quante la gnot;
cussì larà benòn
par l' impresari de iluminazion.
Par bandí la misèrie,
uei che invece di nêf
'e flochi jù farine di formènt,
che al ciadi par zulugne zucar fin,
e che l' aghe dei poz si mudi in vin.

P. ZORUTTL

Induvinèl.

Ài un linzàl
e no lu pues doprá,
ài tanc' zechìns
e no ju pues contá
ài 'ne fertae
e no la pues mangiá.